

梁启超 诗词集（一）

梁启超

目录：

1.去国行.....	2
2.纪事二十四首.....	2
3.读陆放翁集四首.....	3
4.壮别.....	3
5.二十世纪太平洋歌.....	4
6.留别梁任南汉挪路卢 二首.....	5
7.东归感怀.....	5
8.刘荆州.....	5

去国行

呜呼济艰乏才兮，儒冠容容。佞头不斩兮，侠剑无功。君恩友仇两未报，死于贼手母乃非英雄。割慈忍泪出国门，掉头不顾吾其东。东方古称君子国，种族文教咸我同。尔来封狼逐逐磨齿瞰西北，唇齿患难尤相通。大陆山河若破碎，巢覆完卵难为功。我来欲作秦廷七日哭，大邦犹幸非宋聋。却读东史说东故，卅年前事将母同。城狐社鼠积威福，王室蠢蠢如赘疣。浮云蔽日不可扫，坐令蝼蚁食应龙。可怜志士死社稷，前仆后起形影从。一夫敢射百决拾，水户萨长之间流血成川红。尔来明治新政耀大地，驾欧凌美气葱茏。旁人闻歌岂闻哭，此乃百千志士头颅血泪回苍穹。吁嗟乎！男儿三十无奇功，誓把区区七尺还天公。不幸则为僧月照，幸则为南洲翁。不然高山蒲生象山松荫之间占一席，守此松筠涉严冬，坐待春回终当有东风。吁嗟乎！古人往矣不可见，山高水深闻古踪。潇潇风雨满天地，飘然一身如转蓬，披发长啸览太空。前路蓬山一万重，掉头不顾吾其东。

纪事二十四首

人天去住两无期，啼歇年芳每自疑。多少壮怀偿未了，又添遗憾到蛾眉。
颇媿年来负盛名，天涯到处有逢迎。识荆说项寻常事，第一相知总让卿。
目如流电口如河，睥睨时流振法螺。不论才华论胆略，鬢眉队里已无多。
青衫红粉讲筵新，言语科中第一人。座绕万花听说法，胡儿错认是乡亲。
眼中直欲无男子，意气居然我丈夫。二万万人齐下拜，女权先到火奴奴。
眼中既已无男子，独有青睞到小生。如此深恩安可负，当筵我几欲卿卿。
卿尚粗解中行颡，我惭不识左行怯。奇情豔福天难妬，红袖添香对译书。
惺惺含意惜惺惺，岂必圆时始有情。最是多欢复多恼，初相见即话来生。
甘肃西征领右军，几凭青鸟致殷勤。舌人不惜为毛遂，半为宗都半为君。
我非太上忘情者，天赐奇缘忍能谢。思量无福消此缘，片言乞与卿怜惜。
后顾茫茫虎穴身，忍将多难累红裙。君看十万头颅价，遍地鉏耨欲噬人。
匈奴未灭敢言家，百里行犹九十赊。怕有旁人说长短，风云气尽爱春华。
一夫一妻世界会，我与浏阳实创之。尊重公权割私爱，须将身作后人师。
含情慷慨谢婵娟，江上芙蓉各自怜。别有法门弥阙陷，杜陵兄妹亦因缘。
怜余结习销难尽，絮影禅心不自由。昨夜梦中礼天女，散花来去著心头。
卻服权奇女丈夫，道心潭粹与人殊。波澜起落无痕迹，似此奇情古所无。
华服盈盈拜阿兄，相从谭道复谈兵。尊前恐累风云气，更谱军歌作尾声。
万一维新事可望，相将携手还故乡。欲悬一席酬知己，领袖中原女学堂。
昨夜闺中远寄诗，殷勤劝进问佳期。绿章为报通明使，那有闲情似旧时。
珍重千金不字身，完全自主到钗裙。他年世界女权史，应识支那大有人。
匆匆羽檄引归船，临别更慳一握缘。今生知否能重见，一抚遗尘一惘然。

曩译佳人奇遇成，每生游想涉空冥。从今不羨柴东海，枉被多情惹薄情。
鸾飘凤泊总无家，惭愧西风两鬓华。万里海槎一知己，应无遗恨到天涯。
猛忆中原事可哀，苍黄天地入蒿莱。何心更作喁喁语，起趁鸡声舞一回。

读陆放翁集四首

诗界千年靡靡风，兵魂消尽国魂空。集中什九从军乐，亘古男儿一放翁。中国诗家无不言从军苦者，惟放翁则慕为国殇，至老不衰。

辜负胸中十万兵，百无聊赖以诗鸣。谁怜爱国千行泪，说到胡尘意不平。放翁集中胡尘等字，凡数十见，盖南渡之音也。

叹老嗟卑却未曾，用放翁原句。转因贫病气峻嶒。英雄学道当如此，笑尔儒冠怨杜陵。放翁集中只有夸老颂卑，未尝一叹嗟，诚不愧其言也。

朝朝起作桐江钓，昔昔梦随辽海尘。恨杀南朝道学盛，缚将奇士作诗人。宋南渡后，爱国之士欲以功名心提倡一世者亦不少，如陈龙川、叶水心等，亦其人也。然道学盛行，掩袭天下士皆奄奄无生气矣，一二人岂足以振之。

壮别

选第一、十、十一、十五、十八、廿五六首

首途前五日，柏原东亩饯之于箱根之环翠楼。酒次，出缣纸索书。为书“壮哉此别”四字，且系以小诗一首，即此篇第一章是也。舟中十日，了无一事，忽发异兴，累累成数十章。因最录其同体者，题曰壮别，得若干首。

丈夫有壮别，不作儿女颜。风尘孤剑在，湖海一身单。天下正多事，年华殊未阑。高楼一挥手，来去我何难。

狂简今犹昔，裁成意苦何？辙环人事瘁，棒喝佛恩多。翼翼酬衣带，冥冥慎网罗。图南近消息，为我托微波。寄别南海先生一首。先生东还时，在横滨为半日谈。今在香港，且有南洋之行。

赫赫皇华记，凄凄去国吟。出匡恩未报，赠缣爱何深。重话艰难业，商量得失林。只身浮海志，使我忆松阴。别伊藤候一首。

余去年出险之役，及今次远游之费，皆感候之赐。候临别殷勤有所语，且举吉田松阴蹈海事及己前者游学艰辛之状以相告。

第一快心事，东来识此雄。学空秦火后，伯有自述《昔日谭》一书，自言其所学渊源。功就楚歌中。伯一生立于逆境，作事时遇反对，每挫败而气转壮，卒底于成。余最服之。大陆成争鹿，沧瀛蛰老龙。牛刀勿小试，留我借东风。别大隈伯一首。

孕育今世纪，论功谁萧何？华华盛顿拿破仑总馀子，卢卢梭孟孟的斯鸠实先河。赤手铸新脑，雷音殄古魔。吾侪不努力，负此国民多。

极目鉴八荒，淋漓几战场。虎皮蒙鬼蜮，龙血混玄黄。世纪开新幕，此诗成于西历一千

八百九十九年十二月二十七日，去二十世纪仅三日矣。风潮集远洋。泰西人呼太平洋为远洋。作者今日所居之舟，来日所在之洋，即二十世纪第一大战场也。欲闲闲未得，横槊数兴亡。

二十世纪太平洋歌

亚洲大陆有一士，自名任公其姓梁，尽瘁国事不得志，断发胡服走扶桑。扶桑之居读书尚友既一载，耳目神气颇发皇。少年悬弧四方志，未敢久恋蓬莱乡，逝将适彼世界共和政体之祖国，问政求学观其光。乃于西历一千八百九十九年腊月晦日之夜半，扁舟横渡太平洋。其时人静月黑夜悄悄，怒波碎打寒星芒，海底蛟龙睡初起，欲嘘未嘘欲舞未舞深潜藏。其时彼士兀然坐，澄心摄虑游眇茫，正住华严法界第三观，帝网深处无数镜影涵其旁。蓦然忽想今夕何夕地何地，乃在新旧二世纪之界线，东西两半球之中央。不自我先，不自我后，置身世界第一关键之津梁。胸中万千块垒突兀起，斗酒倾尽荡气回中肠，独饮独语苦无赖，曼声浩歌我二十世纪太平洋。巨灵擘地铄鸿荒，飞鼉碎影神螺僵，上有抟土顽苍苍，下有积水横泱泱，抟土为六积水五，位置错落如参商。尔来千劫千纪又千岁，倮虫缘虱为其乡。此虫他虫相阅天演界中复几劫，优胜劣败吾莫强。主宰造物役物物，庄严地土无尽藏。

初为据乱次小康，四土先达爱滥觞：支那印度邈以隔，埃及安息侯官严氏考定小亚细亚即汉之安息，今从之。邻相望，地球上古文明祖国有四：中国、印度、埃及、小亚细亚是也。厥名河流时代第一纪，始脱行国成建邦。衣食衍衍郑白沃，贸迁仆仆浮茶粮，恒河郁壮蜿蜒长，扬子水碧黄河黄，尼罗埃及河名一岁一泛滥，姚台姚弗里士河、台格里士河皆安息大河名。蜿蜒双龙翔。水哉水哉厥利乃尔溥，浸濯暗黑扬晶光。此后四千数百载，群族内力逾扩张，乘风每驾一苇渡，搏浪乃持三岁粮。《汉书·西域传》言渡西海不得风，或三岁乃达。西海即地中海也。就中北辰星拱地中海，葱葱郁郁腾光镜，岸环大小都会数百计，积气森森盘中央。自馀各土亦尔尔，海若凯奏河伯降。波罗的与阿剌伯，西域两极遥相望；亚东黄渤谓黄海、渤海壮以阔，亚西尾闾身毒洋；谓印度洋斯名内海文明时代第二纪，五洲寥邈殊中央。蛰雷一声百灵忙，翼轮降空神鸟翔，哥仑布初到美洲，土人以为天神，见其船之帆谓为翼也。咄哉世界之外复有新世界，造化乃尔神秘藏。阁龙日本译哥仑布以此二字。归去举国狂，帝者挟帙民赢粮，谈瀛海客多于鲫，莽土倏变华严场。揭来大洋文明时代始萌蘖，亘五世纪堂哉皇。其时西洋谓大西洋权力渐夺西海谓地中海席，两岸新市星罗碁布气焰长虹长。世界风潮至此忽大变，天地异色神鬼瞠；轮船铁路电线瞬千里，缩地疑有鸿秘方；四大自由谓思想自由、言论自由、行为自由、出版自由。

塞宙合，奴性销为日月光；悬崖转石欲止不得止，愈竞愈剧愈接愈厉，卒使五洲同一堂。流血我敬俛顿曲，觅得檀香山、澳大利亚洲者，后为檀岛土民所杀。冲锋我爱麦寨郎。以千五百十九年始绕地球一周者。鼎鼎数子只手挈大地，电光一掣剑气磅礴太平洋。太平洋！太平洋！大风泱泱，大潮滂滂，张肺歛地地出没，喷沫冲天天低昂，气吞欧墨者八九，况乃区区列国谁界疆。异哉！似此大物隐匿万千载，禹经亥步无能详，母乃吾曹躯壳太小君太大，弃我不屑齐较量。君兮今落我族手，游刃当尽君所长。吁嗟乎！今日民族帝国主义正跋扈，俎肉者弱食者强，英狮俄鸷东西帝，两虎不斗群兽殃；后起人种日耳曼，国有馀口无馀粮，欲求尾闾今未得，拚命大索殊皇皇；亦有门罗主义北美合众国，潜龙起蛰神采扬，西县古巴东菲岛，中有夏威夷烟微茫，太平洋变里湖水，遂取武库廉奚伤；曩尔日本亦出定，座容卿否容商量。我寻风潮所自起，有主之者吾弗详，物竞天择势必至，不优则劣兮不兴则亡。水银钻地孔乃入，物不自腐虫焉藏。尔来环球九万里，一砂一草皆有主，旗鼓相匹强权强，

惟馀东亚老大帝国一块肉，可取不取母乃殃。五更肃肃天雨霜，鼾声如雷卧榻傍，诗灵罢歌鬼罢哭，问天不语徒苍苍。噫嘻！太平洋！太平洋！君之面兮锦绣壤，君之背兮修罗场，海电兮既设，舰队兮愈张，西伯利亚兮铁道卒业，巴拿马峡兮运河通航，尔时太平洋中二十世纪之天地，悲剧喜剧壮剧惨剧齐鞞鞳。吾曹生此岂非福，饱看世界一度两度为沧桑。沧桑兮沧桑，转绿兮回黄，我有同胞兮四万五千万，岂其束手兮待僵。招国魂兮何方，大风泱泱兮大潮滂滂。吾闻海国民族思想高尚以活泼，吾欲我同胞兮御风以翔，吾欲我同胞兮破浪以飏。海云极目何茫茫，涛声彻耳逾激昂，鼉腥龙血玄以黄，天黑水黑长夜长，满船沈睡我徬徨，浊酒一斗神飞扬，渔阳三叠魂懔伤，欲语不语怀故乡。纬度东指天尽处，一线微红出扶桑，酒罢诗罢，但见寥天一鸟鸣朝阳。

留别梁任南汉挪路卢 二首

冤霜六月零，愤泉万壑哀，寥莪不可诵，游子肝肠摧。魑魅白昼行，啖人如草莱。劳劳生我恩，惨惨入泉台。悠悠者苍天，哀哀者谁子。人孰无天性，人孰无毛里，孰无泪与血，孰无肺与腑，海枯山可移，此恨安可补？沈沈复沈沈，怨毒乃如此。

沥血一杯酒，与君兄弟交，君母即我母，君仇即吾仇。况我实君累，君更不我尤，我若不报君，狗彘之不犹。劝君且勿哭，今哭何所求？磨刀复磨刀，去去不暂留。上有天与日，鉴我即我谋。我行为公义，亦复为私仇，脚踏旧山河，手提贼人头，与君拜墓下，一恸为君酬。万一事不成，国殇亦足豪，云霄六君子，来轸方且遒。谁能久郁郁？长为儒冠羞。

东归感怀

极目中原幕色深，蹉跎负尽百年心。那将涕泪三千斛，换得头颅十万金。鹃拜故林魂寂寞，鹤归华表气萧森。恩仇稠叠盈怀抱，抚髀空为梁父吟。

刘荆州

二千年后刘荆州，雄镇江黄最上游。笔下高文蠹鱼矢，帐前飞将烂羊头。湖北洋操统领夫已氏者，节度使所宠之俊仆也。忍将国难供谈柄，敢与民权有夙仇。闻说魏公加九锡，似君词赋更无俦。